

邵康節先生外紀




叢書集成

初編

主編者
王雲五

商務印書館發行





邵康節先生外紀



3 0646 5135 3

陳繼儒輯

邵康節先生外紀

本館據寶顏堂祕
笈本排印初編各
叢書僅有此本

邵康節先生外紀卷之一

雲間陳繼儒

伯溫曾祖母張夫人遇祖母李夫人嚴甚。夫人不能堪。一夕欲自盡。夢神人令以玉筋食羹。自盡當生佳兒。夫人信之。後夫人病瘦。醫既投藥。又夢寢堂之左右木瓜二株。右者已枯。因取之。大父遵取藥令覆之。及期生康節公。同墮一死胎女也。後十餘年。夫人病臥堂上。見月色中一女子拜庭下。泣曰。母不察庸醫。以藥毒兒。可恨。夫人曰。命也。女子曰。若為命。何兄獨生。夫人曰。汝死兄獨生。乃命也。女子涕泣而去。又十餘年矣。夫人再見女子來。泣曰。兒為庸醫所誤。二十年方得受生。與母緣重。故相別。又涕泣而去。則知釋氏輪迴鬼神之說。有可信者。康節知而不言者也。親謂伯母當作某云。

伊川丈人與李夫人因山行。於雲霧間見大黑猿有感。夫人遂孕。臨岸時。慈烏滿庭。人以為瑞。是生康節公。公初生。髮被面。有齒能呼母。七歲戲於庭。蟻穴中豁然別見天日。雲氣往來。久之。以告夫人。夫人至無所見。禁勿言。既長。遊學晉州。山路馬失。同墮深澗中。從者攀懸下尋。公無所傷。惟壞一帽。熙寧十六年。公年六十七矣。夏六月。屬微疾。一日晝睡覺。且言曰。吾夢旌旗鶴雁自空而下。導吾行亂山。與司馬君實呂晦叔諸公相分別於一驛亭。回視其壁間有大書四字曰。千秋萬歲。吾神往矣。無以醫藥相逼也。嗚呼異哉。

太學博士姜愚字子發。京師人。長康節先公一日。從康節學。稱門生。先公年四十五未娶。潞州張仲賓太

083
112
23419

博字穆之。自未第，亦從康節。子發與二君同白康節曰：不孝有三，無後爲大。先生年踰四十不娶，親老無子，恐未足以爲高。康節曰：貧不能娶，非爲高也。子發曰：某同學生王允脩，頗樂善，有妹甚賢，似足以當先生。穆之曰：先生欲婚，則某備聘，令子發與王允脩言之。康節遂娶先夫人。後二年，允溫始生。故康節有詩云：我今行年四十七，生男方始爲人父。鞠育教誨誠在我，壽夭賢愚繫於汝。我若壽命七十歲，眼前見汝二十五。我欲願汝成大賢，未知天意肯從否。子發本京師富家，氣豪樂施，登進士第，月分半俸奉康節。治平間，知壽州六安縣，以目疾分司居新鄉。子發死，康節以其女嫁河南進士紀輝，視之如己女。伯溫以姊事之。元符三年，紀輝與姜女俱亡，生二子。樂道未遇時，與子發交游甚善。樂道苦辛教小學京師，居州西。子發居州東，相去遠。一日大雪，子發念樂道與其母寒饑，自荷一杓，棧雪以行。至樂道之居，扣門久之，方應。樂道母同凍坐，日高未飯。子發惻然，亟出買酒肉薪炭，往復同樂道母子附火飲食。樂道覺子發衣單，問之，以棉衣質錢買飯食也。子發說論語，士人樂聽之，爲一講會，得錢數百千，爲樂道娶妻。樂道登第，調睦州判官，妻卒。子發又爲求范文正公夫人姪汝陽李氏以繼，其賢義如此。熙寧初，樂道以翰林侍讀學士爲西京留守。子發老益貧且喪明，自新鄉駕小車來見樂道，意樂道哀之也。樂道遺酒三十壺而已。子發殊悵然。康節館於天津之廬，典衣贖其行，歸新鄉未幾卒。

康節先公少日遊學，先祖母李夫人思之恍惚，至倒誦佛書。康節亟歸不復出。夫人捐館，康節特毀甚，躬自爨以養祖父。置家蘇門山下，康節獨築室百源之上。時李成之子挺之，東方大儒也，權其城縣令，一

見康節心相契。授以大學。康節益自克勵。三年不設榻。晝夜危坐以思。寫周易一部貼屋壁間。日誦數十遍。聞汾州任先生者有易學。又往質之。挺之去。爲河陽司戶曹。康節亦從之。寓州學。貧甚。以飲食之油貯燈讀書。一日有將校自京師出戍者。見康節曰。誰苦學如秀才者。以紙百幅。筆十枝爲獻。康節辭而後受。每舉此語先夫人。吾少艱難如此。當爲子孫言之。康節又嘗謂伯溫曰。吾早歲嘗徒步遊學。至有所立艱哉。程伯淳正叔雖爲名士。本出貴家。其成就易矣。因泣書之。以示子孫。

康節先公慶曆間過洛。館於水北湯氏。愛其山水風俗之美。始有卜築之意。至皇祐元年。自衛州共城奉大父伊川丈人遷居焉。門生懷州武陟。知縣侯紹曾字孝傑助其行。初寓天宮寺。三學院劉諫議元瑜字君玉。呂諫議獻可靜居。張少卿師錫。及其子職方君景伯。狀元師德之子諫議君景憲。王諫議益柔字勝之。子中散兄弟。諤字師柔。及其子孫南國張太丞師雄。及諸子。劉龍圖之子祕監几字伯壽。脩撰忱字明復。侍講李寔字景真。吳少卿執中。王學士起字仲儒。李侍講育字仲象。子顓字端伯。姚郎中爽字周輔。交游最早。或稱門生。洛人爲買宅於履道坊西。天慶觀東。趙諫議借田於汝州葉縣。後王不疑同鄉人買田於河南延秋村。康節復還葉縣之田。嘉祐七年。王宣徽尹洛。就天宮寺西天津橋南五代節度使安審珂宅故基。以郭崇廢宅餘財爲屋三十間。請康節遷居之。富韓公命其客孟約買對宅一園。皆有水竹花木之勝。熙寧初。行買官田之法。天津之居亦官田地。勝三月。人不忍買。諸公曰。使先生之宅他人居之。吾輩蒙恥矣。司馬溫公而下集錢買之。康節先生以詩謝王宣徽曰。嘉祐壬寅歲。新巢

始屏功。正分道德里。更近帝王宮。檻仰端門峻。軒迎兩觀雄。窗虛響灑澗。臺迥燦伊嵩。好景尤難得。昌辰豈易逢。無才濟天下。有分樂年豐。水竹腹心裏。爲花淵藪中。老來歡不已。端節嘆何窮。嘯傲陪真侶。經營荷府公。丹誠徒自寫。匪報自恩隆。後以詩謝溫公諸公曰。重謝諸公爲買園。買園城裏占林泉。七千來步平流水。二十餘家爭出錢。嘉祐卜居終是僦。熙寧受券遂能專。鳳凰樓下新閑客。道德坊中舊散仙。洛浦清風朝滿袖。嵩岑皓月夜盈軒。接離倒戴芰荷畔。談麈輕搖楊柳邊。陌徹銅駝花爛熳。堤連金谷草芊綿。青春未老尙可出。紅日已高猶自眠。洞號長生宜有主。窩名安樂豈無權。敢於世上明開眼。會向人間別看天。盡送光陰歸酒盞。都移造化入詩篇。也知此片好田地。消得堯夫筆似椽。今宅契司馬溫公戶名。園契富韓公戶名。庄契王郎中戶名。康節初不敢也。康節蓋曰。貧家未嘗求於人。人饋之雖少必受。嘗謂伯溫曰。名利不可兼也。吾本求名。旣爲世所知矣。何用利哉。故甘貧樂道。平生無不足之意。嗟夫。洛陽風俗之厚。人物之盛。不可見矣。重念老境可傷。因詳書之。以示子孫云。

康節先公謂本朝王事。自唐虞而下所未有者。一革命之日。市不易肆。二克服天下。在即位後。三未嘗殺一無罪。四百年方四葉。五百年無心腹患。故觀盛化詩曰。紛紛五代亂離間。一旦雲開復見天。草木百年新雨露。車書萬里舊山川。尋常巷陌猶簪紱。取次園亭亦管絃。人老太平春未老。爲花無害日高眠。又曰。吾曹養拙賴明時。爲幸居多寧不知。天下英才中道跡。人間好景處開眉。生來只慣見豐稔。老去未嘗經亂離。五事歷將前代舉。帝堯而下固無之。伯溫竊疑未嘗經亂離爲太甚。先公曰。吾老且死。汝

輩行自知之。永念先公。當本朝太平盛時。隱居求志。謝聘不屈。其發爲詩章。每如此。

康節先公與富文忠公早相知。文忠初入相。謂門下士田棐大卿曰。爲我問邵堯夫。可出當以官職起之。不卽命爲先生處士。以遂隱居之志。田大卿爲康節言。康節不答。以詩二章謝之曰。相招多謝不相遣。將謂胸中有所施。若進豈能禁吏責。旣閑安用更名爲。願同巢許稱臣日。甘老唐虞比屋時。滿眼清賢在朝列。病夫無以繫安危。又云。欲遂終焉老閑計。未知天意果如何。幾重軒冕酬身貴。得似雲山到眼多。好景未嘗無興咏。壯心都已入消磨。鶴鴻自有江湖樂。安用區區設網羅。文忠公終不相忘。乃因明堂祫享。赦詔天下舉遺逸。公意謂河南府必以康節應詔。時文潞公尹洛。以兩府禮召見康節。康節不屈。遂以福建黃景應詔。景字子蒙。亦從康節遊。客李邯鄲公家。公之子壽朋薦於潞公。時天下應詔者二十八人。同見宰執於政事堂。至河南黃景。以閩音自通姓名。文忠不樂。各試論一首。命官爲試銜。知縣文忠奏。天下尙有遺才。乞再令舉。詔從之。王拱辰尙書尹洛。乃以康節應詔。潁川薦常秩。皆先除試將作監主簿。不理選限。文忠招康節而不欲私。故以天下爲請。知制誥王介甫不識康節。繳還辭頭曰。使邵某常民。一試銜亦不可與。果賢者不當止與試銜。宜召試。然後官之。上不納。下知制誥。祖無擇除去不理選限行詞。然康節與常秩皆不起。是時富公已丁太夫人憂去位矣。熙寧二年。神宗初卽位。詔天下舉遺逸。御史中丞三司副使吳克龍。圖閣學士祖無擇。皆薦康節。時歐陽公作參知政事。素重常秩。故潁川亦再以秩應詔。康節除祕書省校書郎。潁川團練推官。辭不應。旣受命。卽引疾不起。答鄉人

二詩。一曰。生平不作皺眉事。天下應無切齒人。斷送落花安用雨。裝添舊物豈須春。幸逢堯舜爲真主。且放巢由作外臣。六十病夫宜揣分。監司無用苦開陳。二曰。却恐鄉人未甚知。相知深後又何疑。貧時與祿是可受。老後得官難更爲。自有林泉安素志。況無才業動丹墀。苟楊若守吾儒分。免被韓文議小疵。常秩以職官起。時王介甫方行新法。天下紛然以爲不便。思得山林之士相合。常秩賜對。神宗問曰。仁宗召卿何故不起。朕召何故起。秩曰。仁宗容臣不起。陛下不容臣不起。因盛言新法之便。乃除諫官。以至待制。帝浸薄之。介甫主之不忘。然亦知其爲人矣。熙寧初。介甫之弟安國字平甫爲西京國子監教授。從康節遊歸。以出處語介甫。介甫歎曰。邵堯夫之賢不可及矣。神宗正史。康節列傳。史臣書云。與常秩同召。某卒不起。有以也夫。

康節先公與富韓公有舊。公自汝州得請。歸洛養疾。築大第與康節天津隱居相邇。公曰。自此可時相招矣。康節曰。某冬夏不出。春秋時。間過親舊間。公相招未必來。不召或自至。公謝客戒子曰。先生來不以時見。康節一日過之。公作詩云。先生自衛客西畿。樂道安閒絕世機。再命初筵終不起。獨身窮巷寂無依。貫穿百代嘗探古。吟咏千篇亦造微。珍重相知忽相訪。醉和風雨夜深歸。康節和曰。道堂閒話儘多時。塵外盃觴不浪飛。初上小車人已識。醉和風雨夜深歸。又題康節繫壤詩集云。黎民於變是堯時。便是堯夫德可知。更覽新詩名繫壤。先生全道略無遺。其知康節如此。公常令二青衣蒼頭掖之以行。一日與康節會後園中。因康節論天下事。公喜甚。不覺獨步下堂。康節不爲起。徐指二蒼頭戲公曰。忘却

柱杖矣。公深居託疾謝客。而常苦氣痞。康節曰。好事到手。畏慎不爲。他人做了。鬱鬱何益。公笑曰。此事未易言也。蓋爲嘉祐建儲耳。雖剛勇。遇事詳審。萬全不發。康節因戲之。公一日有憂色。康節問公曰。先生度某之憂安在。康節曰。豈以王安石罷相。呂惠卿參知政事。惠卿凶暴過安石乎。公曰。然。康節曰。公無憂。安石惠卿本以勢利合。惠卿安石勢利相敵。將自爲仇矣。不暇害他人也。未幾惠卿果叛安石。凡可以害安石者無所不至。公謂康節曰。先生識慮絕人遠矣。一日薄暮。司馬公見康節曰。明日僧顯脩開堂說法。富公呂晦叔欲偕往聽之。晦叔貪佛已不可勸。富公果往。於理未便。某後進不敢言。先生曷止之。康節曰。恨聞之晚矣。明日公果往。後康節因見公。謂公曰。聞上欲用裴晉公禮起公。公笑曰。先生以謂某衰病能起否。康節曰。固也。或人言上命公不起。一僧開堂公乃出。無乃不可乎。公驚曰。某未之思也。與康節食筍。康節曰。筍味甚美。公曰。未如中堂骨頭之美也。康節曰。野人林下不食筍三十年。未嘗爲人所奪。公今日可食中堂骨頭乎。公笑而止。康節疾病。公日遣其子偕醫者來。饋藥物不絕。康節捐館。公賻贈之甚厚。伯溫除喪往拜公。公惻然曰。先生高年。嘗勸之學脩養。復曰。不能學。胡走亂走也。問伯溫年幾何。娶未。伯溫對曰。年二十四。未娶。公曰。晚娶甚善。可以保養血氣。專意學問。吾年二十八登科。方娶。嘗白先公。先夫人未第。決不娶。弟妹當先嫁。娶之。故田氏妹先嫁元鈞也。伯溫自此得出。入公門下。悲夫。今海內之士。嘗獲拜公牀下。唯伯溫一人。想公英偉之姿。凜然如在世也。

熙寧三年。司馬溫公與王荊公議新法不合。不拜樞密副使。乞守郡。以端明殿學士知永興軍。後數月神

宗思之曰。使司馬在朝。人主自然無過。舉移許州。令過闕上殿。公力辭。乞判西京留守司御史臺。遂居洛買園於尊賢坊。以獨樂名之。始與伯溫先君子康節遊。嘗曰。光陝人。先生衛人。今同居洛。卽鄉人也。有如先生道學之尊。當以年德爲貴。官職不足道也。公一日着深衣。自崇德寺書局散步洛水堤上。因過康節天津之居。謁曰。程秀才云。旣見溫公也。問其故。公笑曰。司馬出程伯休父。故曰程。留詩云。拜表歸來抵寺居。解鞍縱馬罷傳呼。紫衣金帶盡脫去。便是林間一野夫。草軟波清沙路微。手攜筇杖着深衣。白鷗不信忘機久。見我猶穿岸柳飛。康節和曰。冠蓋紛紛塞九衢。聲名相軋在前呼。獨君都不將爲事。始信人間有丈夫。風背河聲近亦微。斜陽淡泊隔雲衣。一雙白鷺來烟外。將下沙頭又却飛。公一日登崇德閣。約康節久未至。有詩曰。淡日濃雲合復開。碧嵩清洛遠縈廻。林端高閣望已久。花外小車猶未來。康節和云。君家梁上年時燕。過社今年尙未廻。請罰誤君凝竚久。萬花深處小車來。又云。天啓夫君八斗才。野人中路必須廻。神仙一語難忘處。花外小車猶未來。康節有懶起吟一詩云。半記不記夢覺後。似愁無愁情倦時。擁衾側臥未快起。簾外落花撩亂飛。公愛之。請書紙簾上。字畫奇古。某家世寶之。公與康節唱酬甚多。具載擊壤集。公嘗問康節曰。某何如人。康節曰。君實腳踏實地人也。公深以爲知言。至康節捐館。公作挽詩二章。其一曰。慕德聞風久。論交傾蓋新。何須丰舊面。不待一言親。講道切磻直。忘懷笑語真。重言蒙臆寔。佩服敢書紳。記康節之言也。康節又曰。君實九分人也。其重之如此。後公以康節之故。遇其孤伯溫甚厚。公無子。以族人之子康爲嗣。康字公休。其賢似公。識者謂天放生之。

也。公休與伯溫交游益厚。公薨。公休免喪。元祐間。方欲大用。亦不幸。時贈諫議大夫。公休有子植。方數歲。公休素以屬伯溫。如范純夫。內翰輩。皆曰。將以成溫公之後者。非伯溫不可。朝廷知之。伯溫自長子。縣尉。移西京國子監教授。俾植得以卒業。因經紀司馬氏之家。植字子立。既長。其賢如公休。天下謂真溫公門戶中人也。亦蚤死。無子。溫公之世遂絕。

王荆公與呂申公素相厚。荆公嘗曰。呂十六不作相。天下不太平。又曰。晦叔作相。吾輩可以言仕矣。其重之如此。荆公薦申公爲中丞。欲其爲助。故申公初多條例司人作臺官。既而天下苦條例司之爲民害。申公乃言新法不便。荆公怒其叛己。始有逐申公意矣。方其薦申公爲中丞。其辭以謂有八元八愷之賢。未半年所論不同。復謂有共工驩兜之奸。荆公之喜怒如此。初亦未有以罪申公也。會神宗語執政。呂公著常言韓琦乞罷青苗錢數爲執事者所沮。將興晉陽之甲。以除君側之惡。荆公因用此爲申公罪。除侍讀學士。知潁州。袁次道當制辭。荆公使之明著其語。陳相陽叔以爲不可。次道但云敷奏失寔。援據非宜。荆公怒。自改之曰。比大臣之抗章。因便殿之與對。輒誣方鎮有除惡之謀。深駭予聞。無事理之寔。申公素謹密。寔無此言。或云。孫覺莘老嘗爲上言。今藩鎮大臣如此論列。而遭挫折。若當唐宋五代之際。必有與晉陽之甲。以除君側之惡者矣。上已忘其人。但記美鬚。誤以爲申公也。熙寧四年。申公以提舉嵩山崇福宮居洛。寓興教僧舍。欲買宅。謀於康節先生。康節曰。擇地乎。曰。不。擇材乎。曰。不。康節曰。公有宅矣。未幾得地於白獅子巷。張文節相宅西。隨高下爲園。宅不甚宏壯。康節溫公申公時相往。

來申公寡言。見康節必從容。終日亦不過數言而已。一日對康節長歎曰。民不堪命矣。時荆公用事。推行新法者皆新進險薄之士。天下騷然。申公所歎也。康節曰。王介甫者遠人。公與君實引薦至此。尙何言。公作曰。公著之罪也。十年春公起知河陽河南尹。賈公曰。昌衡率溫公程伯淳餞於福先寺上東院。康節以疾不赴。明日伯淳語康節曰。君實與晦叔席上各辯論出處不已。某以詩解之曰。二龍閑臥洛波清。幾歲優游在洛城。願得二公齊出處。一時同起爲蒼生。申公鎮河陽歲餘。召拜樞密副使。後以資政殿學士知定州。又以大學士知揚州。哲宗卽位。拜左丞。遷門下侍郎。與溫公並相元祐。如伯淳之詩云。伯溫以經明行脩命官。見公於東府。公語及康節。咨歎久之。謂伯溫曰。科名特入仕之門。高下勿以爲意。立身行道不可不勉。伯溫起謝焉。公三子。希哲希積希純。皆師事康節。故伯溫與之游甚厚。三年公辭位拜司空。平章軍國事。次年薨。

錢朝請者名景謨。忠懿王孫。嘉祐間官殿直。巡轉西京馬遞鋪鎖廳堂。登進士第。師事康節先生。仲父同場屋。仲父之壻。康節屬以爲誌。熙寧八年。與王十三丈詔景猷同從瀛帥張諫議八丈。景憲定國。辟爲屬官。因康節寄錢丈王丈詩。張丈見之。寄康節詩曰。橋邊處士文如錦。塞上將軍髮似霜。錢丈與王荆公善。後荆公用事。論新法不合。遂相絕。終身爲外官。

邵康節先生外紀卷之二

司馬溫公初居洛。問於康節曰。有尹材字處初。張雲卿字伯紀。田述古字明之。三人皆賢。後處初明之得進於溫公門下。獨伯紀未見。康節以問公公曰。處初明之之賢如先生言。張君者或聞旅殯其父於和州。久不省。未敢與見。康節曰。張雲卿可謂孝矣。雲卿之父謫官死和州。貧不能歸。因寓其喪。雲卿奉其母歸洛。貧甚。府尹哀之。俾爲國子監說書。得月俸七十千以養。若和州一行。則能俸數月。將饑其母矣。其故如此。溫公悵然曰。某之聽誤矣。伯紀自此亦從溫公游。未幾伯紀之母死。徒步至和州迎父柩合塋。三君子旣受知溫公。公入相元祐。處初明之以遺逸命。伯紀以累舉特恩。同除學官。溫公好賢下士。尊用康節之言如此。伯紀學問該洽。於文潞公經史注疏。或有遺忘。多從伯紀質之。

康節先生與趙宗道學士游。宗道年長。康節拜之。其諸子皆以父師之禮事康節。宗道早出富韓公門下。熙寧初。宗道自西都留臺領宮祠以卒。先是宗道季子濟爲提舉。劾富公不行新法。朝廷坐其言。罷富公使相。宗道卒。富公以致政居洛。賻恤其家甚厚。其兄弟服除。欲往謝富公。濟獨未敢行。請於康節。康節曰。以富公德度。尙何望於君。第往勿疑。諸兄行。君不行。是自處以不肖也。明日濟偕諸兄以進。富公撫之甚恩。濟不自安。起謝罪。公止之曰。吾見故人子。前日公事不可論也。濟謝康節曰。微先生濟之過。不可贖也。

熙寧癸丑春。大名王荀龍字仲賢入洛。見康節先公。其議論勁正。有過人者。康節喜之。和其詩曰。車從賞春來。北京耿君先期已馳情。此時隕霜奈何重。今歲開花徒有聲。既辱佳章仍墮刺。寧無累句代通名。天生美才應自惜。料得不爲時虛生。仲賢魏公客也。因出魏公送行詩。顏體大書極奇偉。康節曰。吾少日喜作大字。李挺之曰。學書妨學道。故嘗有詩云。憶昔初學大字時。學人飲酒與吟詩。若非益友推金石。四十五年成一非。仲賢又誦魏公詩云。春去花叢蝴蝶亂。雨餘蔬圃桔槔閑。康節愛之曰。怨而不傷。婉而成章之言也。仲賢之子名嚴。叟字彥霖。元祐初。自知定州安喜縣。召爲監察御史。有直聲。後位簽書樞密院。彥霖父子皆魏公之客。魏公守相州。薦彥霖爲屬。韓康公代魏公。康公欲留彥霖。彥霖謝曰。某魏公之客。不願出他們也。士君子稱之。

康節先公嘗言。李復圭龍圖臨事有斷。年二十八知滑州。與郡官夜會。有衙兵奪銀匠鐵槌殺一人者。一府皆驚擾。公捕至立斬之。上章待罪。諸司亦按公擅殺。仁宗曰。李復圭帥才也。除知慶州。責光化軍。有放停卒自陳。乞添租剋佃某人官田者。公曰。汝揀停之兵。如何能佃官田。卒曰。筋力未衰也。公曰。汝以衰故揀停。既未衰。卻合充軍。呼刺字人刺元軍。分人皆稱之。公才高爲衆所忌。故仕官數不進。公居多不平。康節因和其詩作天吟一篇曰。一般顏色正蒼蒼。今古人曾望斷腸。日往月來無少異。陽舒陰慘不相妨。迅雷震後山川裂。甘露零時草木香。幽暗崑崖生鬼魅。清平郊野見鸞凰。千花爛爲三春雨。萬木彫因一夜霜。此意分明難理會。直須賢者入消詳。蓋其意使有所感悟也。

康節先生赴河南尹李君錫會壺投。君錫末箭中耳。君錫曰：「偶爾中耳。康節應聲曰：『幾乎敗壺。』坐客以爲的對，可謂善譏矣。」

熙寧初，王宣徽之子名正甫，字茂直，監西京糧料院。一日約康節先公同吳處厚、王平甫食飯。康節辭以疾，明日茂直來，康節謂曰：「某之辭會有以姑聽之。」吳處厚者好議論，平甫者介甫之弟，介甫方執政行新法，處厚每譏刺之。平甫雖不甚主其兄，若人面罵之，則亦不堪矣。此某所以辭會也。茂直歎曰：「先生料事之審如此。昨處厚席間毀介甫，平甫作色欲列其事於府，某解之甚苦，乃已。嗚呼！康節以道德尊一代，平居出處一飯食之間，其慎如此，爲子孫者當念之。」

熙寧中，洛陽以道德爲朝廷尊禮。大臣曰富韓公，侍從曰司馬溫公，呂申公，士大夫位卿監以清德早退者十餘人，好學樂善，有行義者幾二十人。康節先生隱居謝聘，皆相從，忠厚之風聞於天下。里中後生皆知畏廉恥，欲行一事必曰：「無爲不善，恐司馬端明知邵先生知。」嗚呼！盛哉！

康節先公嘉祐中朝廷以遺逸命官，辭之不從。河南尹遣官就第送告勅朝章，康節服以謝，卽褐如初。至熙寧初再命官，三辭又不從，再朝章謝，且曰：「吾不復仕矣。始爲隱者之服，烏帽縉褐，見卿相不易也。司馬溫公依禮記作深衣冠簪幅巾縉帶，每出朝服乘馬，用皮匣貯深衣隨其後，入獨樂園則衣之。常謂康節曰：『先生可衣此乎？』」康節曰：「某爲今人當服今時之衣。溫公歎其言合理。」

富公未第時，家於水北上陽門外，讀書於水南天宮寺三學院，有行者名宗顯，嘗給事左右，及公作相，顯

已爲僧。用公奏賜紫方袍。號寶月大師。公致政築大第於至德坊。與天宮寺相邇。公以病謝客。宗顥來或不得前。則直入道堂。見公曰。相公頗憶院中讀書時否。公每爲之笑。時節送遺甚厚。康節先公自共城遷洛。未爲人所知也。宗顥獨館焉。可見宗顥非俗僧也。康節登其院。嘗作洛陽懷古賦。

熙寧間。宗顥尙無恙。伯溫嘗就其院讀書。宗顥每以富公爲學。晚事相。勉曰。公夜枕圓枕。庶睡不能久。欲有所思。冬以冰雪。夏以冷水沃面。其勤苦如此。

康節先生常言。本朝祖宗立法。非前代可比。內無大臣跋扈。外無藩鎮強橫。亦無大盜賊。獨夷狄爲可慮。故有十六國詩曰。普天之下。號寰區。大禹曾經治水餘。衣到弊時多虱虱。瓜當爛熳足蟲蛆。龍章本不資狂寇。象魏何嘗薦亂胡。尼父有言堪味處。當時欠一管夷吾。又作觀碁詩。歷敍古今。至西晉云。二主蒙霜露。五胡犯鼎彝。世無管夷吾。令人重歎歎。常曰。孔子念管仲之功。自不以被髮左衽爲幸。若管仲者可輕議哉。嗚呼。有以也夫。

熙寧三年四月。朝廷初行新法。所遣使者皆新進少年。遇事風生。天下騷然。州縣始不可爲矣。康節先公閑居林下。門生故舊仕宦四方者。皆欲投劾而歸。以書問康節先公。康節先公答曰。正賢者所當盡力之時。新法固嚴。能寬一分。則民受一分之賜矣。投劾而去。何益。嗚呼。康節先公深達世務。不以沾激取虛名如此。所謂康節先公爲隱者非也。

康節先公出行不擇日。或告之以不利。則不行。蓋曰。人未言則不知。旣言則有之。而必行。則鬼神敵也。春

秋祭祀。約古今禮行之。亦焚楮錢。程伊川怪問之。則曰。明器之義也。脫有一非。豈孝子慈孫之心乎。又曰。吾高曾今時人。以籩豆簠簋薦牲不可也。伯溫謹遵遺訓而行之也。

伯溫侍家庭。請於康節先公曰。大人至和中。仁宗在御。富公當國。可謂盛矣。乃謝聘不起何也。先公曰。本朝至仁宗。政化之美。人材之盛。朝廷之尊。極矣。前或未至。後有不及也。天之所命。非偶然者。吾雖出。尙何益。是非爾所知也。伯溫再拜稽首。不知所以問。

康節先公遺訓曰。汝固當爲善。亦須量力以爲之。若不量。雖善亦不當爲也。故有詩曰。量力動時無悔吝。隨宜樂處省營爲。若求騏驎方乘馬。只恐終身無馬騎。又嘗曰。善人固可親。未能知不可急合。惡人固可疏。未能遠不可急去。必招悔吝也。故無吝君序曰。見善人未嘗急合。見不善人未嘗急去。伯溫終身佩之不敢忘。

康節先公言東京有一道人。日飲酒於市。嘗曰。今日當有某人來。已而果然。自此莫不信之。不知何術。曰無心耳。曰無心可學乎。答曰。才欲使人學。無心卽有心矣。又程伊川先生言。諫貶涪州。過漢江。中流船幾覆。舉舟之人皆號泣。伊川但正襟安坐。心存誠敬。已而船及岸。於同舟衆人中有老父。問伊川曰。船當危時。君正坐甚嚴。何以。伊川曰。心守誠敬耳。老父曰。心守誠敬固善。不若無心。伊川尙欲與之言。因忽不見。人果無心。險難在前。猶平地也。老子曰。入水不濡。入火不熱。唯無心者能之。

康節先公見一道人。言嘗泛海。遇舶風泊岸。與數人下採薪。有巨人長十數丈餘。相呼之聲如禽獸。盡捉

以去。用竿竹魚貫之。食薦酒。道人者偶在其竹末。巨人醉睡。走登船得脫。因解衣出其所穿。跡在脇下。康節先公曰。四海之外。何所不有。但人耳目不能及耳。

熙寧中有一道人無目。以錢置手掌中。卽知正背年號。人皆異之。康節先公問曰。以錢置爾之足。亦能知之乎。道人答曰。此吾師之言也。愧謝而去。

伯溫少時。因讀文中子。至使諸葛武侯無死禮樂其有興乎。因著論以謂武侯霸者之佐。恐於禮樂未能興也。康節先公見之。怒曰。汝知武侯猶不可妄論。况萬萬相遠乎。以武侯之賢。安知不能興禮樂也。後生輒議先賢。亦不韙矣。伯溫自此於先達不敢妄論。

伯溫上世范陽。以中直篤寔讀書謹禮爲家法。大父伊川丈人尤質直。平生不妄笑語。年七十有九。以治平四年正月初一日捐館。初無疾。不食飲水者累日。除夜康節先公以下侍立左右。伯溫方七歲。大父鍾愛之。亦立其旁。大父曰。吾及新年往矣。康節先公以下皆掩泣。大父止之曰。吾兒以布衣名動朝廷。子孫皆力學孝謹。吾瞑目無憾。何用哭。大父平日喜用大杯飲酒。謂康節先公酌酒與汝別。康節同叔父滿酌大杯以獻。大父一舉而盡。再酌飲及半。氣息微矣。謂康節曰。吾生平不害物。不妄言。自度無罪。卽死以肉祭。勿做佛事。亂吾教。無令吾死婦人手。汝兄弟候我就小殮。方令家之人哭。勿叫號。俾我失路。康節先公泣涕以從。康節謀葬大父。與程正叔先生同卜地於伊川神陰原。不盡用葬書。大抵以五音擇地。以昭穆序葬。陰陽拘忌之說皆所不信。以是年十月初三日葬。開棺顏貌如生。伯溫尙紀之。熙

寧十年夏。康節先生感微疾。氣日益耗。神日益明。笑謂司馬溫公曰。某欲觀化一巡如何。溫公曰。先生未應至此。康節先生曰。死生常事耳。張橫渠先生喜論命。來問疾。因曰。先生論命否。當推之。康節先公曰。若天命則知之。世俗所謂命則不知也。橫渠先生曰。先生知天命矣。某尙何言。程伊川曰。先生至此。他人無以爲力。願自主張。康節先公曰。平生學道。豈不知此。然亦無所主張。時康節正寢。諸公議後事於外。有欲葬近洛城者。康節先公已知。呼伯溫入曰。諸公欲以近城地葬我。不可。當從伊川先塋耳。七月初四日。大書詩一章曰。生于太平世。長于太平世。死于太平世。客問年幾何。六十有七歲。俯仰天地間。浩然獨無愧。以是夜五更捐館。其治命如大父。伯溫不敢違。先是康節先公每展伊川大父墓。中塗上官店。必過經孝傑殿。丞家孝傑從康節先公最早。孝傑死。有八子。康節先公遇之如子姪。每過之。則迎拜侍立。左右甚恭。康節先公捐館之年。寒食過之。謂諸子曰。吾再經此。與今日異矣。諸子不敢問。至塋喪車及上官店。諸子泣言之。以爲異。張景觀字臨之。學行甚高。康節先公喜之。將赴涪州武龍尉。告別。康節先公泣數行下。謂曰。吾不見子之歸矣。張岫字子堅。康節先公於門弟子中。謂可語道者。赴調京師。康節先公愀然色變曰。吾老矣。不復相見也。皆是年之春也。嗚呼。康節先公所以預知者。何止此哉。伯溫不肖。不能有所述也。惟脩身俟死。下從九原耳。尙追憶其遺言。以示子孫。

康節先公與呂微仲丞相不相接。先公與橫渠先生張子厚同。以熙寧十年丁巳捐館。今微仲文集中。有和母同州丁巳吟云。行高名並美。命否數皆殂。嗟爾百君子。賢哉二丈夫。世方敦薄俗。邵堯夫樂道不住誰復

距虛無。張子厚論佛老之失望道咸瞠若。脩梁遽壞乎。密章燔漢綬。環徑泣秦儒。賴有諸良友。能令紹不孤。爲先公與子厚作也。蓋河南府以先公訃聞。詔贈著作郎。謚康節。子厚自祕閣病免西歸。及長安以歿。門人衰服挽車。葬橫渠云。伯溫獲見公。每語先公。則悵然有不可及之歎。後伯溫初仕長子縣尉。公入相。元祐改西京國學教授。未久公罷政。嗚呼。亦所以爲不孤之惠歟。康節先生居洛。凡交遊。年長者拜之。年等者與之爲朋友。年少者以子弟待之。未嘗少異於人。故得人之歡心。每歲二月出。四月天漸熱。卽止。八月出。十一月天漸寒。卽止。故有詩云。時有四不出。大風大雨大寒大熱。會有四不赴。公會葬會生會。醴會。每出人皆倒屣迎致。雖兒童奴隸皆知尊奉。每到一家。子弟家人爭具酒饌。問其所欲。不復呼姓。但名曰。吾家先生至也。雖閨門骨肉間事。有未決者。亦求教。康節先公以至誠爲之開諭。莫不說服。十餘家如康節先公所居安樂窩。起屋以待其來。謂之行窩。故康節先公沒。鄉人挽詩有云。春風秋月嬉遊處。冷落行窩十二家。洛陽風俗之美如此。康節先公過士友家。晝枕見其枕屏畫小兒行藏。以詩題其上云。遂令高臥人。欹枕看兒戲。蓋熙寧間也。陳恬云。擊壤集不載。

熙寧初。歐陽文忠公爲參知政事。時遣其子棐叔弼來洛。省王宣徽夫人之疾。將行語叔弼曰。到洛時。可見邵先生爲致吾嚮慕之意。康節先生旣見叔弼。從容與語平生出處。以及學術大概。臨別猶曰。其無忘鄙野之人於異日。後十年。康節先公捐館。又十年。韓康公尹洛。請謚於朝。叔弼偶爲太常博士。次當謚議。叔弼常謂晁說之以道云。棐作邵先生謚議。皆往昔所親聞於先生者。當時少年一見。忻然延接。

語及平生學術出處之大故得其詳如此豈非先生學道如絕世前知來物預以告耶蓋驗於二十年之後異哉。

康節先公少時遊京師與國子監直講邵不疑初敘宗盟不疑年長康節先生以兄拜之蓋不疑自河朔遷丹陽康節先公上世亦河朔人故也至康節自衛入洛不疑爲西京提刑嘉祐中河南府薦康節先生以遺逸不疑自作薦章其詞有厚德足以鎮薄俗清風可以遺來世相推重如此熙寧初不疑以龍圖閣學士知成都府過洛謂康節先公曰某陛辭日再薦先生矣康節先公追路洛北別去不疑中途寄康節先生詩云我乘孤傳經滑澠君擁羣書臥洛城富貴人間亦何有閒忙趣味甚分明不疑次金牛驛暴卒喪歸康節先公哭之慟女嫁楊國寶應之應之亦康節先公門生康節先公視之猶子也聞禮元豐中爲河南府推官康節已捐館伯溫復以兄拜之宣和己丑伯溫赴果州道出閬州有知閬中縣邵充美儒者相迎自稱同姓姪云伯溫以宗族源流爲問美儒曰充之上世自潤州入蜀龍圖公先人叔父行也伯溫曰康節先公以兄弟龍圖公伯溫不敢忘自此與美儒之中外皆論親癸巳伯溫奉使西州美儒居郾嘗至其家拜刑部公廟美儒資和厚與人言如恐傷之至臨吏政是非毅然不可奪君子人也丹陽河南成都之邵其弟兄如此嗟夫世不講宗盟久矣具載之以示三家子孫

伯溫之叔父諱睦後祖母楊氏夫人出也少康節先公二十餘歲力學孝謹事康節如父熙寧元年四月八日暴卒年三十三康節先公哭之慟既卒理其故書得叔父所作重九詩云衣如當日白花似昔年

黃擬問東籬事。人生定杳茫。及死殯後。圃東籬下。噫。人之死生。是果前定矣。

康節先公既捐館。二程先生於伯溫有不孤之意。所以教載甚厚。宗丞先生謂伯溫曰。人之爲學。忌標準。若循循不已。自有所至矣。先人敝廬。廳後無門。由傍舍委曲以出。某不便之。因鑿壁爲門。侍講先生見之曰。前人規畫必有理。不可改作。某亟塞之。侍講謂周全伯曰。邵君雖小事亦相信。勇於爲善者也。某初入仕。侍講曰。凡作官。雖所部公吏有罪。立案而後決。或出於私怒。比具案亦散。不至倉卒傷人。每決人有未經杖責者。宜慎之。恐其或有所誤也。伯溫終身行之。熙寧八年秋。與士人十餘輩講學於洛陽建春門裏廣愛寺瑞像院。以待試。一夕夢至殿庭。唱第。望殿上女主也。覺謂同舍言之。皆不曉。至元祐二年秋。以經行薦。明年春。唱名集英殿。宣仁太后垂簾聽政也。方悟前夢驗於十五年之後。果有數矣。

邵康節先生外紀卷之三

方潞公作者英會。時康節先生已下世。有中散大夫吳執中者。少年登科。皇祐初已作祕書丞。不樂仕進。覓休致。其年德不在諸公下。居洛多杜門。人不識其面。獨與康節相善。執中未嘗一至公府。其不預會者。非潞公遺之也。文潞公嘗曰。人但以某長年爲慶。獨不知閱世既久。內外親戚皆亡。一時交遊凋零。殆盡。所接皆邈然少年。無可論舊事者。正亦無足慶也。范忠宣公亦曰。或相勉以攝生之理。不知人非久在世之物。假如丁令威千歲化鶴歸鄉。見城郭人民皆非。則獨存何足樂者。嗚呼。皆達理之言也。

康節先生嘗誦奇夷先生之語曰。得便宜事不可再作。得便宜處不可再去。又曰。落便宜是得便宜。故康節詩云。珍重至人嘗有語。落便宜是得便宜。蓋可終身行之也。英宗卽位。侍御史呂晦叔獻可言。歐陽脩首建邪議。推尊濮安懿王。有累聖德。并劾韓琦。曾公亮。趙槩。積十餘章。不從。乞自貶。又十餘章。率其屬以御史敕告納章帝前曰。臣言不效。不敢居此位。出知蘄州。徙晉州。神宗卽位。擢天章閣待制。復知諫院。權御史中丞。帝方勵精求治。一日紫宸早朝。二府奏事。久日刻晏。例隔登對。官於後殿。頃上更衣。復坐。以次贊引。獻可待對於崇政司。馬公爲翰林學士。侍讀邇英閣。亦趨贊善堂待召。相遇朝路。並行而北。溫公密問曰。今日請對何所言。獻可舉手曰。袖中彈文乃新參也。溫公愕然曰。王介甫素有學行。命下之日。衆皆喜於得人。奈何論之。獻可正色曰。君寔亦爲此言耶。安石雖有時名。好執偏見。不通物。

情輕信。姦回喜人佞己。聽其言則美。施於用則疏。若此在侍從。猶或可容。置諸宰輔。必天下受其禍矣。溫公又諭之曰。與公相知。有所懷。不敢不盡。未見其不善之迹。遽論之不可。獻可曰。上新嗣位。富於春秋。朝夕謀議者。二三執政爾。苟非其人。則敗國事。此乃腹心之疾。治之惟恐不及。願可緩耶。語未竟。閣門吏抗聲追班。乃各趣以去。溫公自經筵退。默坐玉堂。終思之。不得其說。既而縉紳間寔有傳其疏者。多以爲太過。未幾中書省置三司條例司。相與議論者。以經綸天下爲己任。始變祖宗舊法。專務聚斂。私立條目。頒於四方。妄引周官。以寔誅賞。輔弼異議。不能回。臺諫從官。力爭不能奪。州郡或奉行微忤其意。則譴黜從之。所用皆儉薄少年。天下騷然。於是昔之懷疑者。始愧仰歎服。以獻可爲知人。溫公與安石相論辨。尤力。神宗欲兩用之。命溫公爲樞密副使。溫公以言不從。不拜。以三書詆安石。冀其或聽而改也。安石如故。所言終安石不聽。乃絕交。溫公既出。退居於洛。每慨然曰。呂獻可之先見。吾不及也。獻可言安石不已。出知鄧州。康節先生與獻可善。方獻可初赴召。康節與論天下事。至獻可謫官。無一不如所言者。故獻可之爲鄧州也。康節寄以詩云。一別星霜二紀中。升沈音問不相通。林間談笑須歸我。天下安危且係公。萬乘几前常蹇謬。百花洲上略相從。不知月白風清夜。能憶伊川舊釣翁。獻可和云。冥冥鴻羽在雲天。逸阻風音已十年。不爲聖朝求治理。尙容遺逸臥林泉。羨君自有隨時樂。願我官閒飽晝眠。應笑無成三黜後。病衰方始賦歸田。獻可尋請宮祠歸洛。溫公康節日相往來。

程宗丞先生名頤字伯淳。弟侍講先生名頤字正叔。康節先公以兄事其父太中公。二先生皆從康節遊。

其師曰周敦頤茂叔。宗丞爲人清和。侍講爲人嚴峻。每康節議論。宗丞心相契若無所問。侍講則時有往復。故康節嘗謂宗丞曰。子非助我者。然相知之盡。二先生則同也。橫渠張先生名載。字子厚。弟戩。字天祺。爲二程先生之表叔。子厚少豪其才。欲結客取熙河鄆鄆之地。范文正公帥延安。聞之。館於府第。俾脩制科。與天祺皆登進士第。方同二程先生脩中庸大學之道。尤深於禮。熙寧初。子厚爲崇文院校書。天祺與伯淳同爲監察御史。時介甫行新法。伯淳自條例司官爲御史。與臺諫官論其不便。俱罷。上猶主伯淳。介甫亦不深怒之。除京西北路提點。伯淳力辭。乞與同列俱貶。改澶州簽判。天祺尤不屈。一日至政事堂。言新法不便。介甫不答。以扇障面而笑。天祺怒曰。笑某不知天下人笑參政也。趙清獻公同參大政。從旁解之。天祺曰。公亦不可謂無罪。清獻有愧色。謫監鳳翔府司竹監。舉家不食筍。其清如此。未幾卒於官。子厚亦求去。熙寧十年。吳充丞相當國。復召還館。康節已病。子厚知醫。亦喜談命。診康節脈曰。先生之疾無慮。又曰。頗信命否。康節曰。天命某自知之。世俗所謂命某不知也。子厚曰。先生知天命矣。尙何言。子厚入館數月。以病歸。過洛。康節已捐館。折簡慰撫。伯溫勤甚。見二程先生曰。某之病必不起。尙可及長安也。行至臨潼縣。沐浴更衣而寢。及旦視之亡矣。門生衰絰挽車。葬鳳翔之橫渠。是謂橫渠先生。伯淳自澶州請監洛河木竹務。以便親除判武學。未赴。以中丞李定言罷。知開封府。扶溝縣失囚。謫汝州監酒。元祐初。以宗政丞召將大用。未赴。卒。葬伊川。文潞公表其墓曰。明道先生正叔。元祐初。用司馬溫公呂申公薦。召對。初除職官。再除館職。除崇政殿說書。歲餘。出判西京國子監。兩除直

祕閣不拜。紹聖中坐元祐黨謫涪州。遇上皇卽位。赦得歸。久之復官以卒。是謂伊川先生。二先生俱從康節遊。康節尤喜明道。其譽之與富韓公司馬溫公呂申公相等。故康節四賢詩云。彥國之言鋪。陳晦叔之言簡。當君寔之言優游。伯淳之言調暢。四賢洛之觀望。是以在人之上。有宋熙寧之間。大爲一時之壯。則康節之所以處明道者盛矣。一日二程先生侍太中公訪康節於天津之廬。康節攜酒飲月陂上。歡甚。語其平生學術出處之大。明日悵然謂門生周純明曰。昨從堯夫先生遊。聽其議論。振古之豪傑也。惜無所用於世。純明曰。所言何如。明道曰。內聖外王之道也。是日康節有詩云。草軟波平風細溜。雲輕日淡柳低摧。狂言不記道何事。劇飲未嘗如此杯。好景只知閒信步。朋歡那覺大開懷。必期快作賞心事。却恐賞心難便來。明道和云。先生相與賞西街。小子親攜几杖來。行處每容參劇論。坐隅還許瀝餘杯。檻前流水心同樂。林外青山眼重開。時泰心閑兩難得。直須乘興數追陪。明道敬禮康節如此。故康節之葬。伯溫獨請誌其墓焉。悲夫。先生長者已盡。其遺言尙存。伯溫自念其晚景可傷。不可使後生無聞也。因此載之。

陳瓘字瑩。中閩人。有學問。年十八登進士甲科。紹聖初。用章惇薦爲大學博士。先是惇之妻嘗勸惇無脩怨。惇作相。專務報復。首起朋黨之禍。惇妻死。惇悼念不堪。瑩中見惇容甚戚。謂惇曰。公與其徒自悲傷。曷若念夫人平生之言。蓋譏惇之報怨也。惇以爲忤。不復用。曾布爲相。薦瑩中爲諫官。爲都司。蔡卞據王安石日錄。改脩神宗寔錄。曾布亦主熙寧元豐之政。瑩中上布書。謂卞尊私史以壓宗廟。及論時政。

之不當時。布又以爲忤。出之瑩中。爲諫官時。爲上皇極言蔡京蔡卞不可用。用之決亂天下。蔡京深恨之。屢竄責例。用赦放歸。猶隸通州。一日瑩中之子走京師。言蔡京事。詔獄下明州。捕瑩中甚急。士民哭送之。瑩中不爲動。旣入獄。見其子被繫。笑曰。不肖子煩吾。蔡京用酷吏李孝壽治其事。孝壽坐廳事。篋中列五木於庭。引瑩中間之。瑩中從容曰。蔡京之罪。某實知之。不肖子不知也。多求紙自書。孝壽懼。以瑩中爲不知情。卽日放歸。再隸通州。其子配海上。瑩中撰尊堯集。以辯王安石妄作日錄。以詆祖宗者。今行于世。靖康初。不及大用以死。特贈諫議大夫。瑩中晚喜康節先生之學。嘗從伯溫求遺書曰。吾於康節之學。若有得也。

昔者河圖洛書出。聖人因之而畫卦。數則未有也。黃帝之世。大撓氏始作甲子。以天干地支配五行。易已寓乎其中。及周文王之重爻。夫子之十翼。易之道於是乎大備。其數已炳炳乎具已。其數本於河圖。其言休咎本於聖經。乃萬世之固有。非由外以附鑠。乃漢唐以降。世衰道微。以巧辭曲說亂正經。以鑽灼龜瓦言休咎。斯數所以無傳。我宋藝祖撫有區夏。擯棄浮僞。崇尚德化。圖南先生方以斯數顯。其推明爻象。皎如日星。指陳休咎。應若影響。其言至廣至大。其道至易至簡。得其道者。雖愚可哲。雖庸可智。福可以就。禍可以避。苟從事口頰。輕棄聖人之道。如土芥賤物。雖得之必失之。孔子曰。作易者。其有憂患乎。斯聖人之深意也。宋堯夫邵雍序。

或謂康節曰。河洛數不許行到後天。五爻行到四爻。方可斷人生死。今有不滿二十而死者。亦有八九十

而死者禍福安在。對曰：此人不達物理，貴賤壽夭，吾數已備言之矣。公便熟看，却來商量。

邵康節曰：讀河圖成變化，行鬼神不外乎數。數具五行萬物，與天地同體，則氣同五行亦同。萬物不離五行之數，天地開闢以至混沌，元會運世計十二萬九千六百年，天地之大數也。人物生死於百歲之中者，人物之小數也。天地假河圖以示人，惟伏羲聖人識得，故畫卦以示人，盡雖無文，終日所言不離乎是。考之地理書、算命書、麻衣相書、卜筮書，聖人制禮作樂，皆出於河圖之五行，洛書之數亦五行而已。蓋天地間理無二理，氣無二氣，數豈出於理氣之外乎？此大易之書所以爲大，而數已具於易，故爲數小也。要之亦不過一陰一陽以兩其五行而已。

邵伯溫曰：河洛數以乾坤爲大父母，姤復爲小父母，乾六變生歸妹，本得三十二陽，坤六變生漸，本得三十二陰，乾坤錯綜陰陽各得三十二，生六十四卦。先君得之，李之才挺之，李之才得之，穆伯長得之，陳圖南書不專言數，以義理玩味之，可以趨吉避凶，不可形之於書。妄言禍福，輕泄天機，必有天譴。昔有王夫竊是書得科第，後遭貶謫之禍，異人指以爲天譴也。

邵伯溫辯惑云：沈存中筆談言江南人王夫字揚庭，曾爲一書談易，其間一說曰：乾坤大父母云同前，卽邵氏先天數也。予復見兵部侍郎秦玠論夫所談，駭然曰：何處得此法？玠云：嘗遇一異人，受此曆數，推往古興衰運曆，無不皆驗。當恨不能盡其術，西都邵雍亦知大略，已能洞知吉凶之變。今此人乃形之於書，必有天譴，此非世人所得聞也。切惟我先君易學微妙，某不肖，不得知也。其傳授本末，則受易於

李之才挺之。李之才挺之師穆伯長。穆伯長師陳搏圖南。先君之學雖有傳授。而微妙變通。則其所自得也。平時未嘗妄以語人。惟大名王天悅。滎陽張子望。嘗從學。又皆早死。秦玠王夫嘗欲從。先君以玠頗好任數。夫志在口耳。多外慕。皆不之許。天悅感疾且卒。夫賂其僕於臥內竊得之。遂以爲己學。著易傳。易測。宋範五經。明用。數書皆破碎妄作。穿鑿不根。夫竊天悅書入京師。補國子監。解試策問。八卦次序。夫以所得之說對。而有司異之。擢在優等。既登第。以所著書投贄公卿之間。後以贓罪竄。秦謂必有天譴。恐指此也。秦旣知夫竊書。乃謂夫何處得此書。又謂邵某聞大略。近乎自欺矣。然謂得之異人。蓋指希夷而言也。

康節先公先天之學。伯溫不肖。不敢稱贊。平居於人事機祥。未嘗輒言。治平間。與客散步天津橋上。聞杜鵑聲。慘然不樂。客問其故。則曰。洛陽舊無杜鵑。今始至。有所主。客曰。何也。康節先公曰。天下將治。地氣自北而南。將亂。自南而北。今南方地氣至矣。禽鳥飛類。得氣之先者也。春秋書六鵠退飛。鸛鶴來巢。氣使之也。自此南方草木皆可移于北。南方疾病瘴瘧之類。北人皆苦之矣。至熙寧初。其言乃驗。異哉。故康節先公嘗有詩曰。流鶯啼處春猶在。杜宇來時春已非。又曰。幾家大第橫斜照。一片殘春啼子規。其旨深矣。伯溫後聞熙州有唐碑。本朝未下時。一日有家雀數千。集其上。人惡之曰。豈此地將爲漢有耶。因焚之。蓋夷中無此禽也。已而果然。因并記之。以信先君之說。康節先公於書無所不讀。獨以六經爲本。蓋得聖人之深意。平生不爲訓解之學。嘗曰。經意自明。苦人不知耳。屋下蓋屋。牀下安牀。滋惑矣。所

謂陳言生活者也。故有詩曰：陳言生活不須矜，自是中才皆可了。以老子爲知易之體，以孟子爲知易之用。論文中子謂佛爲西方之聖人，不以爲過於佛老之學，口未嘗言知之而不言，故有詩曰：不佞禪伯，不諛方士，不出戶庭，直際天地。其所著皇極經世書，以元會運世之數推之，千歲之日，可坐致也。以太極爲堂奧，乾坤爲門戶，包括六經，陰陽剛柔，行乎其間，消息盈虛，相爲盛衰，皇王帝伯，相爲治亂，其肯爲訓解之學也。

邵康節先生外紀卷之四

經世本先天方圓圖說

查顏散

康節先天之易。尙象而不尙辭。觀物篤有所謂律呂圖。聲音圖。八卦交爲十二辰圖。十二辰交而爲十六位圖。太極圖。旣濟陰陽圖。掛一圖。三千六百年圖。諸圖之傳。並無一字言其所以然。蓋欲示不言之教。如伏羲六十四卦。初無言語文字也。然其圖雖多。特只本之先天六十四卦方圓圖。且以先天圖言之。圓圖象天包於地外。方圖象地處於天中。是一大陰陽相配也。分圓圖而觀。乾兌離震居左爲天卦。巽坎艮坤居右爲地卦。分陰陽立兩儀。而主運行不息之事。分方圖而觀。西北十六卦。天卦自相交。東南十六卦。地卦自相交。其斜行則乾兌離震巽坎艮坤。自西北而東南。皆陰陽之純卦也。不能生物。西南十六卦。天去交地。天卦皆在上。而生氣在首。故能生動物。而頭向上。東北十六卦。地去交天。天卦皆在下。而生氣在根。故能生植物。而頭向下。其斜行則泰損旣濟益恆未濟咸否。自東北而西南。皆陰陽得偶之合也。所以能生物也。又合二圖而觀。方圖乾處圓圖亥位。謂之天門。是天氣下降也。方圖坤處圓圖巳位。謂之地戶。是地氣上騰也。此兩十六卦。所謂陰陽互藏其宅也。方圖泰處圓圖寅位。謂之鬼方。方圖否處圓圖申位。謂之人路。此兩十六卦。是天交天地交地。而生生不息。所以泰居寅。而否居申。所謂陰陽各從其類也。夫圓圖主運行之事。方圖主生物之事。運行者氣也。生物者質也。氣非質則無所

附麗。質非氣則豈能生物哉。康節經世書本先天方圓圖。其作用大略如此。

經世要旨

余孟宣

先天之學。本來只是先天六十四卦。大橫圖一二八八之序。橫圖者。卦之所以列。二八八者。數之所由肇。卦之於數。猶形之於影耳。由是取橫圖。復至乾三十二卦。自北歷東。以至於南。取垢至坤三十二卦。自南歷西。以終於北。以應天之運。而天根月窟。自然之理。不假作為。莫不作對待。而圓圖立矣。取橫圖。乾一宮之八卦。自乾至泰。橫布於圓圖之內。而兌二宮之八卦。自履至臨。皆布於乾宮八卦之上。餘六卦。以次橫列。而乾居西北。坤居東南。否泰陰陽之交。居於東北西南。以應地之方。橫斜曲直之妙理。無窮。而方圖立矣。若夫圓圖之發用。則以乾兌離震三十二卦為陽。為在天日月星辰之四象。為元會運世之大四象。震離二宮為陽中陰。兌乾二宮為陽中陽。又分天道之陰陽。太少。坤艮坎巽三十二卦為陰。為在地水火土石之四象。為歲月日時之小四象。巽坎為陰中陽。艮坤為陰中陰。又分地道之柔剛。太少。其數則自一一二二。以至八八。竝以十二三十累。因而為分秒之數。全數悉具觀物篇中。如天地各錯綜數湯之妙。自見本篇。今不繁具。若夫方圖之取用。則分為四比。西北十六陽卦。為天卦。而乾主之。東南十六陰卦。為地卦。而坤主之。否泰所主。元會運世。凡三百六十運。四千三百二十世。十二萬九千六百年。皆有當時直事之卦。派其始。如星甲辰子之直事卦。所謂盡前有易也。直事卦者。即掛一卦也。運世年月皆有之。以掛一全卦之序。分去如每運每世每年每月。竝用四及直之其餘。及即掛也。為說甚多。今不繁具。或以世卦配運卦。或以年卦配世卦。須合方圖天地卦分位置左右。若世卦配運世卦。居左左為天。卦配世則世卦居左左為天。

卦右爲地卦須變。考大四象掛一之卦，以求分數。致大四象元會元會運世是何位即合掛一何以爻變以合方圖。所得之卦一某卦，而質於圓圖，以察理亂休咎，而圓圖陰卦爲歲月日時，主動植事物，自有律呂聲音數，合方圖天地卦位置，左右橫看既濟卦，考大小四象，而得掛一之卦，以求分秒。二數人用分亦質於圓圖，以觀臧否。謂得掛一卦以質之圓圖在何處如陽中陽則極治之時事物皆美陰中陰極亂之時繞乏卦氣發，歛屈伸之類，凡古今治迹，只是憑一定之卦，以推步動植事物，則隨時取聲音數，以求卦而占測也。定圖卦者掛一之序也聲音者方所謂經者，猶言經緯經綸之義，觀天之數，以元經會者，猶以十二會爲經，而三百六十運以下爲緯，觀地之數，以會經運者，猶以二百五十運爲經，而以二千九百八十四世以下爲緯，觀人之數，以運經世者，猶以一百二十世爲經，而三千六百年爲緯。謂一元則經之以會九會也。雖曰斷自唐虞以下，而百世亦推也。邵子志存斯世，故惟以經世人事名籍，但動植事物之數，雖屬圓圖陰卦，而歲月日時□□分秒太細，故以四卷載律呂聲音之變，而悉歸之方圖矣。蓋方圓二圖，錯綜而用，變動不居，不可爲典要也。皇極取河圖天五地六二中以立數，取圓圖太少陰陽剛柔之倡和，得一萬七千二十四，凡日月星辰之變，水火土石之化，律呂聲音之實數，同歸於此。以此一萬七千二十四自乘，得二萬八千九百八十一萬六千五百七十六，是爲動植通數，而用之以取掛一卦二百五十六者也。以圓圖大四象每元之元一大位各全具六十四卦係十六之乘十六又四其六十四也取掛一卦之法，乃用前數二萬八千九百八十一萬六千五百七十六，是爲九位掛其中五之位，看左右位陰陽進退消息虛張其說繁晦今故略之學。掛一卦起於元之元，元之泰卦，乃方圖者，但按邵子所傳掛一卦之序，定攷之，似不須布壽以自惑也。

東北之位終始萬物之義。故運世與年各用掛一全卦之序。而直事仍取合於方圖天地卦。圓圖大小

四象。而後分秒之數歸宿矣。今當一元之午會癸運西世即一歲之五月初十日酉時也是謂大小四象

皇極經世以六十四卦四之為二百五十六卦。一千五百三十六爻。分直二十四氣。三百六十日。每一氣首分四爻。直間謂之藏間。二十四氣共九十六爻。其餘每四爻直一日。五行生旺休囚。定其休咎。據一歲如此。大之而元會運世。小之而歲月日時。一以此推之。謂之加一倍法。程子所謂一日之運。即千歲之運。其理不過如此。二百五十六卦謂之拐。一卦起例。在祝氏鈴中。以萬物之通數而消息之。不知果是康節置卦之原否也。

五行法只以乾坎艮震巽離坤兌為序。以兌一為例。季秋冬 季冬春 季春夏 季夏秋 廢休 死囚 沒胎 相旺

家傳邵康節先生心易數序

宋慶曆間。先生隱居山林。留心學易。冬不鑪。夏不扇。心在易而忘於寒暑也。猶為未至。遂糊易在壁。坐臥未嘗忘。心目無不在焉。一日午睡。有鼠遊於前。以所枕瓦枕頭擊之。鼠走枕破。覺枕中有字。取視之云。此枕數當卯年肆月重四日巳時見鼠而破。先生嘆訝之曰。物皆有數。於是詢問。竟往窺家問其匠曰。昔嘗有一老者。手執周易來憇於上。所書之字。必斯人也。今不至已久矣。吾識其家。乃索同往訪焉。及門問其故。家人曰。今則亡矣。但遺書一册在家。囑云。至某年某月某時。有一秀才至吾家。可以此書授之。則終吾身之事畢矣。其家將是書授先生而觀之。乃易書也。就以此例卜其家曰。汝臥床下有白金。

一筮取之可爲營葬事。其家從而掘之。果得金矣。先生受書謝而歸。暇日究玩。皆不用卜筮。而知吉凶之理。無不應驗。是乃易數精微之妙也。後因觀梅。見二雀爭枝。布算而知晚有鄰女折花。墜傷其股。蓋此寓卜有此。後世相傳。遂以爲觀梅數也。與夫卜落花。知明日午爲馬所賤毀。算西林寺額。知有陰人禍。蓋此皆爲先天數也。未得卦而得數。以數起卦。故曰先天。若夫見老人有憂色。卜而知其有食魚之禍。見少年有喜色。占而知其有幣聘之喜。聞雞鳴。知雞必受烹。餽卜牛鳴。知牛必遭宰殺。此皆論後天之數。蓋未得數。先得卦。以卦起數。故曰後天。一日坐一椅。就以所置年月日時推卜之。書於椅底曰。某年月日此椅當被仙客坐折。至期果有道者來訪。坐椅而破。仙客有愧。起謝。先生曰。物之成敗皆有定數。又何足介意。且公真神仙也。幸得款話。因舉椅揭所書示之。其道者愕然趨起。出忽不見。乃知數之玄妙。雖鬼神莫逃。而況於人乎。況於物乎。

邵雍字堯夫。其先范陽人。父古徙衡漳。又徙共城。雍年三十游河南。葬其親伊水上。遂爲河南人。雍少時自雄其才。慷慨欲樹功名。爲書無所不讀。始爲學。卽堅苦刻厲。寒不爐。暑不扇。夜不就席者數年。已而歎曰。昔人尙友千古。而吾獨未及四方。于是踰河汾。涉淮漢。周流齊魯。宋鄭之墟。久之。幡然來歸曰。道在是矣。遂不復出。北海李之才攝共城令。聞雍好學。嘗造其廬。謂曰。子亦聞物理性命之學乎。雍對曰。幸受教。乃事之才。受河圖洛書。宓戲八卦六十四卦圖像。之才之傳。遠有端緒。而雍探賾索隱。妙悟神契。洞徹蘊奧。汪洋浩博。多其所自得者。及其學益老。德益邵。玩心高明。以觀夫天地之運化。陰陽之消

長遠而古今世變。微而走飛草木之性情。深造曲暢。庶幾所謂不惑。而非依倣象類。億則屢中者。遂衍
宓義先天之旨。著書十餘萬言。行於世。然世之知道者鮮矣。初至洛。蓬華環堵。不庇雨風。躬樵鬻以
事父母。雖平居屢空。而怡然有所甚樂。人莫能窺也。及執親喪。哀毀盡禮。富弼司馬光呂公著諸賢退
居洛中。雅敬雍。恆相從遊。爲市園宅。雍歲時耕稼。僅給衣食。名其居曰安樂窩。因自號安樂先生。且則
焚香燕坐。晡時酌酒三四甌。微醺卽止。常不及醉也。興至輒哦詩自咏。春秋時出遊城中。風雨常不出。
出則乘小車。一人挽之。惟意所適。士大夫家識其車音。爭相迎候。童孺嘶隸。皆慙相謂曰。吾家先生至
也。不復稱其姓字。或留信宿。乃去。好事者別作屋如雍所居。以候其至。名曰行窩。司馬光兄事雍。而二
人純德。猶鄉里所慕嚮。父子昆弟每相飭曰。毋爲不善。恐司馬端明邵先生知。士之過洛者。有不之公
府。必之雍。雍德氣粹然。望之知其賢。然不事表襮。不設防畛。羣居燕笑。終日不爲甚異。與人言樂道其
善。而隱其惡。有就問學。則答之。未嘗強以語人。人無貴賤少長。一接以誠。故賢者悅其德。不賢者服其
化。一時洛中人才特盛。而忠厚之風聞於天下。熙寧行新法。吏牽迫不可爲。或投劾去。雍門生故友居
州縣者。皆貽書訪雍。雍曰。此賢者所當盡力之時。新法固嚴。能寬一分。則民受一分賜矣。投劾何益耶。
嘉祐詔求遺逸。留守王拱辰以雍應詔。授將作監主簿。復舉逸士。補潁川團練推官名。皆固辭。乃受命。
竟稱疾不之官。熙寧十年卒。年六十七。贈祕書省著作郎。元祐中。賜諡康節。雍高明英邁。迥出千古。而
坦夷渾厚。不見圭角。是以清而不激。和而不流。人與交久。益尊信之。河南程顥初侍其父識雍。論議終

日退而歎曰。堯夫內聖外王之學也。雍知慮絕人。遇事能前知。程頤嘗曰。其心虛明。自能知之。當時學者因雍超詣之識。務高雍所爲。至謂雍有玩世之意。又因雍之前知。謂雍于凡物聲氣之所感觸。輒以其動而推其變焉。於是撫世事之已然者。皆以雍言先之。雍盡未必然也。雍疾病。司馬光張載程顥程頤晨夕候之。將終共議喪葬事外庭。雍皆能聞人所言。召子伯溫謂曰。諸君欲葬我近城地。當從先塋爾。既葬。顥爲銘墓。稱雍之道純一不雜。就其所至。可謂安且成矣。所著書曰皇極經世觀物內外篇。漁樵問對。詩曰伊川擊壤集。子伯溫別有傳。

邵伯溫傳。字子文。洛陽人。康節處士雍之子也。雍名重一時。如司馬光韓維呂公著程頤兄弟皆交其門。伯溫入聞父教。出則事司馬光等。而光等亦屈名位輩行。與伯溫爲再世交。故所聞日博。而尤熟當世之務。光入相。嘗欲薦伯溫。未果而薨。後以河南尹與部使者薦。特授大名府助教。調潞州長子縣尉。初蔡確之相也。神宗崩。哲宗立。邢恕自襄州移河陽。詣確謀造定策事。及司馬光子康詣闕。恕召康詣河陽。伯溫謂康曰。公休除喪。未見君不宜枉道。先見朋友。康曰。已諾之。伯溫曰。恕傾巧。或以事要公。休若從之。必爲異日之悔。康竟往。恕果勸康作書稱確。以爲他日全身保家計。康恕同年登科。恕又出光門下。康遂作書如恕言。恕蓋以康爲光子。言確有定策功。世必見信。旣而梁燾以諫議召恕。亦要燾至河陽。連日夜論確功不休。且以康書爲證。燾不悅。會吳處厚奏確詩謗朝政。燾與劉安世共請誅確。且論恕罪。亦命康分析。康始悔之。康卒。子植幼。宣仁后憫之。呂大防謂康素以伯溫可託。請以伯溫爲西京

教授以教植。伯溫既至官，則誨植曰：溫公之孫，大諫之子，賢愚在天下可畏也。植聞之力學不懈。卒有立紹聖初，章惇爲相，惇嘗事康節，欲用伯溫。伯溫不往，會法當赴吏部銓，程頤謂伯溫曰：吾危子之行也。伯溫曰：豈不欲見先公于地下耶？至則先就部擬官，而後見宰相。惇論及康節之學曰：嗟乎！吾于先生不能卒業也。伯溫曰：先君先天之學，論天地萬物未有不盡者，其信也。則人之仇怨反覆者，可忘矣。時惇方興黨獄，故以是動之。惇悚然，猶薦之于朝，而伯溫願補郡縣吏。惇不悅，遂得監永興軍鑄錢監。時元祐諸賢方南遷，士鮮訪之者。伯溫見范祖禹于咸平，見范純仁于潁昌，或爲之恐不願也。會西邊用兵，復夏人故地，從軍者得累數階。伯溫當行，輒推同列，秩滿惇猶在相位。伯溫義不至京師，從外臺辟環慶路帥幕，實避惇也。徽宗卽位，以日食求言，伯溫上書累數千言，大要欲復祖宗制度，辨宣仁誣謗，解元祐黨錮，分君子小人，戒勞民用兵，語極懇至。宣仁王后之謗，伯溫旣辨之，又著書名辨誣。後崇寧大觀間，以元符上書人分邪正等。伯溫在邪等中，以此書也。出監華州西嶽廟，久之，知峽州靈寶縣。徙芮城縣，丁母憂，服除，主管永興軍耀州三白渠公事，童貫爲宣撫使，士大夫爭出其門。伯溫聞其來，出他州避之。除知果州，請罷歲輸瀘南諸州綾絹絲綿數十萬，以寬民力。除知興元府，遂寧府邠州皆不赴。擢提點成都路刑獄，賊史斌破武休，入漢利窺劍門，伯溫與成都帥臣盧法原合謀守劍門，賊竟不能入。蜀人德之。除利路轉運副使，提舉太平觀。紹興四年卒，年七十八。初邵雍嘗曰：世行亂蜀安可避居。及宣和末，伯溫載家使蜀，故免于難。伯溫嘗論元祐紹聖之政曰：公卿大夫當知國體，以蔡確姦

邪。投之死地。何足惜。然嘗爲宰相。當以宰相待之。范忠宣有文正餘風。知國體者也。故欲溥確之罪。言
既不用。退而行確詞。命然後求去。君子長者仁人用心也。確死南荒。豈獨有傷國體哉。劉摯。梁燾。王巖
叟。劉安世。忠直有餘。然疾惡已甚。不知國體。以貽後日縉紳之禍。不能無過也。趙鼎少從伯溫游。及當
相。乞行追錄。始贈祕閣脩撰。嘗表伯溫之墓曰。以學行起元祐。以名節居紹聖。以言廢于崇寧。世以此
三語盡伯溫出處云。著書有河南集。聞見錄。皇極系述。辨誣。辨惑。皇極經世序。觀物內外篇解。近百卷。
三子溥博傳。



編主五雲王

編初成集書叢

紀外生先節康邵

中華民國二十五年六月初版

輯者 陳繼儒

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

(本書校對者喻飛生)

★D一三五三

朱



83
14
:3419